



DOMOWINA

Jednanski porjad Zwjazkowego předsydstwa Domowiny za wólbnu dobu 2021-2025

§ 1

Powšitkowne zasady džěławosće

1. Zwjazkowe předsydstwo Domowiny nawjeduje džěło třěšneho zwjazka mjez hłownymi zhromadźiznami.
2. Zestawa, nadawki a kompetency zwjazkowego předsydstwa rjaduja artikl 9, wotrězki 1 - 8 wustawkow Domowiny.
3. Zwjazkowe předsydstwo spjelnja swoje nadawki z/ze
 - rjadnymi a wurjadnymi posedženjemi,
 - džěłom prezidija po §12 tutoho porjada,
 - analytiskim a koncepcionelnym předdžěłom džěłowych wuběrkow a skupinow,
 - koordinaciju a integraciju cyłnaronadneho džěła we wothłosowanju z předsydstwami,
 - sobudžěłom sobustawskich župow a towarstwow kaž tež z druhimi zwjazkarjami,
 - skutkowanjom kóždeho jednotliwego čłona zwjazkowego předsydstwa w swoim towarstwje a w zjawnosći,
 - aktiwnym zjawnostnym džěłom wo zaměrach třěšneho zwjazka a wo položanju a zajimach serbskeho ludu.
4. Zwjazkowe předsydstwo schadźuje so po artiklu 9, dypk 7 wustawkow Domowiny znajmjeńša štyri króć wob lěto. Nimo toho zwoła so kóžde lěto klawturne posedženje. K tomu so lětny plan džěławosće nastaji, kotryž nimo terminow tež měštnosć a wobsahowe ćežišća posedženjow postaji.

§ 2

Nadawki zwjazkowego předsydstwa

1. Zwjazkowe předsydstwo ma po artiklu 9 dypki 4 do 6 wustawkow Domowiny slědowace nadawki:
 - a. rozsudzić wo prašenjach běžneho džěła Domowiny mjez hłownymaj zhromadźiznomaj,
 - b. postajeć ćežišća džěławosće a rjadować zawjazowace zamołwitosće za zwoprawdženje nadawkow,
 - c. přijimać prawidlownje rozprawy předsydy a prezidija Domowiny,
 - d. postajeć zamołwitosće a nadawki prezidija,

- e. rjadować wobsydstwo a financy Domowiny,
- f. přijimać a schwalec financne a hospodarske plany a rozprawy,
- g. wutworjeć džělowe wuběrki,
- h. přijimać rozprawy hłowneje jednačelki wo džěle zarjada Domowiny a postajeć ćežišća džěla zarjada,
- i. postajeć ćežišća džělawosće Domowinje přislušacych institucijow a wotrjadow,
- j. přijimać rozprawy nawodow Domowinje přislušacych institucijow a wotrjadow,
- k. nachwilnje přijimać nowe towarstwa do Domowiny,
- l. nachwilnje rozsudźeć wo nošerstwach dalšich institucijow abo wotrjadow pod třěchu Domowiny,
- m. powołać a wotwołać resp. nominować zastupjerjow Serbow do/z gremijow a přijimać prawidłownje rozprawy wo jich džělawosći,
- n. wobzamkować džělowe porjady Domowinskeho zarjada a Domowinje přislušacych institucijow a wotrjadow,
- o. powołać a wotwołać nawodow Domowinje přislušacych institucijow a wotrjadow,
- p. powołać a wotwołać hłownu jednačelku a jednačela Domowiny,
- q. wobzamkować wuznamjenjenske porjady Domowiny, kiž njejsu z wobstatkom tutech wustawkow, a wolic člonow mytowanskeho wuběrka,
- r. namjetować hłownej zhromadźiznje po doporučanju změrcowskeho wuběrka wotwołanje člona zwjazkowneho předsydstwa z wólbneje funkcije,
- s. rozsudźeć na zakładže doporučanja změrcowskeho wuběrka wo přikazanym nachwilnym wotpočowanju funkcije člona,
- t. rozsudźeć wo přiwzaću nachwilneho złoženja wólbneje funkcije na zakładže podača swójskeje wole.

2. Dalše nadawki zwjazkowneho předsydstwa su:

- a. přihłosować namjetej wo změnje městneho plana struktury zarjada abo wotrjadow Domowiny,
- b. přihłosować namjetej wo přistajenju abo pušćenju sobudžělačerja wyše zaslužbneje skupiny 11 tarifa TV-L,
- c. přihłosować jednotliwym investicijam wyše 10.000 €,
- d. přihłosować nakupej abo předaću imobilijow.

§ 3

Posedženja zwjazkowneho předsydstwa

1. Wuradźowanja zwjazkowneho předsydstwa su po artiklu 9, dypk 8 wustawkow Domowiny zjawne. Wuradźowanja zwjazkowneho předsydstwa měli po župnych teritorijach pućować. Nowinska rěčnica Domowiny informuje medije tydžeń do posedženja wo wobsahach zjawneho džěla posedženja. Zjawny džěl posedženjow wusyła so jako livestream do syće, jeli techniske móžnosće na městnosći wuradźowanja to dowola. Livestreamy posedženjow měli jedyn měsac online přistupne być a so potom hasnyć. Zarjad Domowiny ma trěbne techniske wobstejnosće rjadować.
2. Wuradźowanje džěli so po potrebjce do zjawneho a njezjawneho džěla. Zjawny a njezjawny džěl posedženja matej so w namjeće za dnjowy porjad wupokazać.

3. Personalne prašenja maja so w kóždym padže w njezjawnym dźělu wuradźowanja a w njeprítomnosći potrjecheneho wobjednać.
4. „Nuprašowanja člonow Domowiny a hosći k serbskim naležnosćam“, „rozprawa předsydy a člonow zwjazkowneho předsydstwa wo dźěławosći třěšneho zwjazka mjez posedženjomaj zwjazkowneho předsydstwa“, „informacija k aktualnym aspektam dźěławosće zarjada Domowiny a Rěčneho centruma WITAJ“ a „aktualna debata člonow zwjazkowneho předsydstwa“ měli stajny wobstatk posedženja być.
5. Čłonojo zwjazkowneho předsydstwa maja prawo, temy za „aktualnu debatu“ hač do 3 dźělowych dnjow do posedženja zwjazkowneho předsydstwa zarjadej Domowiny pisomnje zapodać. Wo dalšich a pozdžišich namjetach smě so wotwisnje wot časowych móžnosćow na městnje posedženja rozsudzić.
6. Nimo toho smě kóždy člon zwjazkowneho předsydstwa do schwalenja dnjowneho porjada próstwu wo wuzamknjenje zjawnosće při wobjednanju wěsteho dypka dnjowneho porjada stajić. Wo próstwyje wothłosuje so po § 7 wotrězki 7 do 9.
7. Čłonojo zwjazkowneho předsydstwa su winowaci, wo wšitkich w njezjawnym dźělu posedženja wobjednaných naležnosćach mjelčeć.
8. Rjadne posedženja zwjazkowneho předsydstwa zwoła předsyda Domowiny na zakładze schwaleneho lětneho plana dźěławosće.
9. Wurjadne posedženje zwoła předsyda po pisomnym žadanju znajmjeńša štwórciny člonow zwjazkowneho předsydstwa, třoch towarstwow abo prezidija (hlej wustawki Domowiny artikl 9, dypk 7). Wone ma so w běhu dweju tydženjow přewjesć.
10. Přeprošenje z namjetom za dnjowy porjad a předłohami posedženja ma kóždy rjadny člon zwjazkowneho předsydstwa najpozdžišo 7 dnjow do wuradźowanja dóstać. Jeli sej to adresat přeje, móža so jemu podložki tež digitalnje sposrědkować. Wo naležnosćach, kiž njejsu w připóslanym namjeće za dnjowy porjad zapisane, smě so jenož potom wuradźować a rozsudzić, hdyž njeda so naležnosć přestorčić a zwjazkowe předsydstwo wobjednanju přihłosuje.
11. Přeprošenje z namjetom za dnjowy porjad a předłohami posedženja dóstawaja tež hłowna jednaćelka a jednaćel, nawodnica Rěčneho centruma WITAJ, jeje zastupjer a referenća zarjada Domowiny.
Samsne płaci za předsydu rewizijneho wuběrka a předsydu změrcowskeho wuběrka, jeli sej to přejetaj.
12. Podložki zjawneho dźěla posedženja dóstawaja tež županojo a předsyda sobustawskich towarstwow, kotřiž njejsu z člonom zwjazkowneho předsydstwa, jeli sej to přeja.
13. Podložki njezjawneho dźěla posedženja dóstawaja wosoby po § 5 dypk 10.

14. Posedženja zwjazkowego předsydstwa přewjeduja so po móžnosći realnje na postajenej městnosći.
15. Posedženja přewjeduja so po artiklu 6, wotrězk 6 wustawkow pak realnje, po elektroniskim puću (na příklad přez telefon abo widejowu konferencu) abo w měšanej formje z přítomnymi kaž tež z wobdžělnikami přez widejowu konferencu, druhe medije abo telefon.
16. Wobdžělenje na widejowej konferency, přez druhe medije abo telefon je po artiklu 6, wotrězk 7 wustawkow Domowiny jenož z legitimaciskimi a přistupnymi datami móžne, kotrež za wotpowědne posedženje płaća. Daty so we wosebitej mejlce sčasom do zhromadźizny posrědkuja.

§ 4

Nawjedowanje posedženjow

1. Posedženja nawjeduje předsyda, w padže jeho zadžěwanja městopředsydaj. Za wobjednanje jednotliwych dypkow dnjoweho porjada móže prezidij druhich zamołwitych zasadzić.
2. Předsyda a městopředsydaj tworja posedženski prezidij. Nawoda posedženja konsultuje so we wažnych prašenjach nawjedowanja posedženja a dodžerženja wustawkow Domowiny kaž tež jednanskeho porjada zwjazkowego předsydstwa z dalšimaj člonomaj posedženskeho prezidija. Wonaj měłoj nawodu posedženja ze swójskeho wida na předpisane postupowanje skedźbnić, je-li trěbne. Hewak jeho při nawjedowanju posedženja podpěrujetaj.
3. Nawoda posedženja ma slědowace nadawki:
 - posedženje zahajić a přítomnych powitać,
 - přizjewić, zo so wotběh zjawneho džěla posedženja natoči a zo njesu žane dalše natočenja dowolene,
 - přizjewić, zo so zjawny džěl posedženja digitalnje jako livestream do syće wusyla,
 - přítomnosť a zamołwjenja zwěsćić,
 - wobzamknjenjakmanosć zwěsćić,
 - zajatosć zwěsćić,
 - wo dnjowym porjedže wothłosować dać,
 - diskusiju k jednotliwym dypkam nawjedować a z wobsahowym rezimejom zakónčić,
 - konkretny tekst wobzamknjenja do wothłosowanja předčitać resp. posłowny namjet za wobzamknjenje sformulować abo přeformulować,
 - wo předłohach a druhich namjetach k wobzamknjenju wothłosować dać,
 - rezultat wothłosowanja zwěsćić (tři kategorije: za namjet/za naraženje, přećiwo namjetej/pšešiwo naraženju a so hłosa wzdám/se głosa zdžaržyjom),
 - přiwažće abo wotpokazanje namjeta zwěsćić,
 - wo wokolnym abo listowym wothłosowanju naležnosće rozsudzić dać,
 - wo wjacorych čitanjach wěstyh předłohow rozsudzić dać,

- wo wotsadženju dypkow dnjowego porjada resp. wo wróćodaću předłohow k dalšemu wobdźěłanju w prezidiju abo džěłowych wuběrkach rozsudzić dać,
- porjadny wotběh posedženja na zakładze jednanskeho porjada zawěsćić a domowe prawo wukonjeć,
- wo wobsahach medijowych wozjewjenjow rozsudzić dać a
- posedženje zakónčić.

§ 5

Wobdźělenje na posedženjach

1. Čłonojo zwjazkowego předsydstwa su winowaci, so na posedženjach wobdźělić. W padže zadžěwanja su winowaci, předsydu abo sekretariat zarjada Domowiny do posedženja wo tym informować.
2. Lisćina za wupłaćenje posedženskich pjenjow płaci zdobom jako lisćina přitomnosće. Kóždy člon zwjazkowego předsydstwa zapisa so ze swojim podpismom do lisćiny přitomnosće a wupjelni lisćinu za zarunanje jězbnych wudawkow, jeli spjelni k tomu trěbne wuměnjena po płaciwym rjadowanju.
3. Čłonojo zwjazkowego předsydstwa smědža so digitalnje na posedženju wobdźělić.
4. Digitalne wobdźělenje zapisa předsyda do lisćiny přitomnosće.
5. Člon zwjazkowego předsydstwa, kotryž chce posedženje dočasnje wopuścić, ma to nawodže posedženja zdžělić.
6. Po artiklu 9, dypk 3 wustawkow Domowiny mataj so hłowna jednaćelka a jednaćel na posedženjach zwjazkowego předsydstwa z poradźowacym hłosom wobdželeć. Samsne přitrjechi za nawodnicu Rěčneho centruma WITAJ a jeje zastupjerja, tematizuja-li so kubłansko-politiske prašenja. Medijowy rěčnik, referentka za naležnosće třěšneho zwjazka a referentka za gremijowe a ministerialne naležnosće so tohorunja na posedženjach wobdželeja.
7. Předsyda rewizijnego wuběrka kaž tež předsyda změrcowskeho wuběrka mataj po artiklu 9, dypk 3 wustawkow Domowiny prawo, so na wuradźowanjach zwjazkowego předsydstwa z poradźowacym hłosom wobdželeć.
8. Zastupjer Domowiny we FUEN-prezidiju ma prawo, so z poradźowacym hłosom na posedženjach zwjazkowego předsydstwa wobdželeć.
9. K zjawnym posedženjam ma kóždy zajimc přistup. Zajimcy pak nimaja prawo, do jednanjow zapřimnyć abo wotběh posedženja mylić.
10. Na njezjawnym džělu wobdželeja so čłonojo zwjazkowego předsydstwa, hłowna jednaćelka a jednaćel, referentka za naležnosće třěšneho zwjazka, referentka za gremijowe a ministerialne naležnosće kaž tež protokolantka / protokolant ze zarjada. Rjadowanja § 7, dypk 13 nastupajo zajatosće maja so dodžeržeć. Jeli sej maćizna předwidžaneho dypka to žada, smědža so dalše wosoby na njezjawnym džělu

přeprošyc. Na njezjawnym džělu smětaj so tež předsyda rewizijnego wuběrka a předsyda změrcowskeho wuběrka wobdžělic, hdyž wo to prosytaj.

§ 6

Wobdžělenje na diskusiji

1. Čłonojo zwjazkoweho předsydstwa a prezidija, hłowna jednaćelka, jednaćel a wobdžělnicy po § 5 dypki 6 do 9 tutoho porjada, kaž tež přeprošeni hosćo maja prawo, so słowa jimać, hdyž jim nawoda posedženja słowo přepoda. Kóždy diskutant mět so jenož dwójce k samsnej naležnosći wuprajic. Słowo so po rjedže přizjewjenow přepodawa. Wo řečenskim prawje njeprošenych hosći rozsudza posedženski prezidij.
2. Čłon zwjazkoweho předsydstwa, kiž chce k jednanskemu porjadej řečec, přizjewi to ze zběhnjenjom wobeju rukow. Wón dóstanje potom hnydom słowo.
3. Hdyž wuprajitej so žadanje abo namjet k wothłosowanju, smětaj zasadnje jedyn čłon zwjazkoweho předsydstwa za to a jedyn přećiwo tomu řečec. Potom so wothłosuje.
4. Řečny čas móže so wot posedženskeho prezidija po potrebnosći wobmjezować. Hdyž so hižo k wěcy njerěči, ma nawoda posedženja prawo, řečnikej słowo sćazać.
5. Jednanski porjad dowola čłonom zwjazkoweho předsydstwa w běhu posedženja sćěhowace namjety:
 - wróćenje naležnosće do prezidija, do džěłoweje skupiny resp. do džěłoweho wuběrka abo zarjadej Domowiny, zo by so předłoha k tomu přihotowała resp. předležaca předłoha so předžěłala,
 - wotsadženje naležnosće z dnjoweho porjada resp. přestorčenje wobjednanja,
 - wokolne wothłosowanje po posedženju, ručež předleži předžěłany namjet za wobzamknjenje,
 - zakónčenje diskusije k naležnosći,
 - wothłosowanje wo předložce resp. wo namjeće k wobzamknjenju,
 - přetorhnjenje abo zakónčenje posedženja,
 - wuzamknjenje zjawnosće,
 - žadanje za tajnym wothłosowanjom abo za wothłosowanjom po mjenje,
 - naprašowanje wěcywustojnych wosobow a
 - přepodaće połnomocy k doskónčnemu rozsudej prezidijej, předsydzce abo zarjadej Domowiny.
6. Čłon zwjazkoweho předsydstwa, kotryž je so k diskusiji přizjewił a njeje zakónčeneje diskusije dla wjace słowo dóstał, smě swój přinošk pisomnje předsydzce zapodać. Přinošk so protokolej připožži.
7. Do wothłosowanja wo předłohach a namjetach za wobzamknjenje smě kóždy čłon zwjazkoweho předsydstwa wosobinske wujasnjenje wotedać. K tomu přepoda jemu nawoda posedženja po wotpowědnym přizjewjenju słowo. Tajke wosobinske wujasnjenje smě jenož poprawa wopačnych wuprajenow abo wotwobaranje wosobinskeho nadběha wobsahować.

§ 7 Wothłosowanja a wobzamknjenja

1. Po artiklu 6, dypk 3 wustawkow Domowiny je zwjazkowe předsydstwo kmane k wobzamknjenju, hdyž je wjace hač połojca jeho člonow přitomnych.
2. Namjet je přiwzaty, hdyž je wjetšina přitomnych hłosakmanych za namjet hłosowała, dalokož njeje to w tutym porjedže abo we wustawkach hinak postajene. Při samsnej ličbje hłosow za abo přećiwo namjetej je namjet wotpokazany.
3. K wothłosowanju dóstanje kóždy člon hłosowanske kartki (zelenu kartku z napismom "za namjet/za naraženje", čerwjenu kartku z napismom "přećiwo namjetej/pšešiwo naraženju" a bělu kartku z napismom "so hłosa wzdám/se głosa zdžaržyjom").
4. Wotedate hłosy digitalnje přizamknjenych člonow zwěšća nawoda posedženja z pomocu wobrazowki. Za čas wothłosowanja a wuličenja dyrbi wosoba, kotraž wothłosuje, na wobrazowce widžeć być. Jeli njeje wosoba widžeć abo njeda so wotedaty hłós přirjadować, so tutón njeliči.
5. Namjet k wobzamknjenju dyrbi pisomnje abo ertnje jasnje sformulowany być, prjedy hač so wo nim wothłosuje.
Wo kóždym namjeće so jednotliwje wothłosuje.
Hdyž předleža wjacore namjety k wobzamknjenju nastupajo samsnu naležnosć, potom wothłosuje so najprjedy namjet, kiž po wobsahu najbóle wotpowěduje zaměrej wobzamknjenja.
6. Signalizuje-li jedne sobustawske towarstwo z pisomnym wopodstatnjenjom w předpolu posedženja k namjetej za wobzamknjenje sylne wobmyslenja, ma so předsydstwo tutoho towarstwa do wothłosowanja słyšeć. Słyšenje předsydstwa tutoho towarstwa so přewjedže w zwjazkowym předsydstwje.
7. Wothłosuje so zasadnje zjawnje ze zběhnjenjom hłosowanskeje kartki.
8. Hdyž sej to jedyn člon zwjazkowego předsydstwa žada, potom so po mjenje abo tajnje wothłosuje.
Předležitej wobaj namjetaj, potom so tajnje wothłosuje.
Při wothłosowanju po mjenje předčita nawoda posedženja mjena wotpowědneho člona zwjazkowego předsydstwa, kiž dyrbi potom prajić, hač wón "za namjet" abo "přećiwo namjetej" hłosuje resp. so hłosa wzda. To so we wotpowědnej lisćinje dokumentuje a protokolej přida.
Člonojo zwjazkowego předsydstwa, kiž njesu wobzamknjenju při hłosowali, smědža sej žadać, zo so to w protokolu naspomni.
9. Po artiklu 6, dypk 4 wustawkow Domowiny móže zwjazkowe předsydstwo tež po pisomnym puću rozsudy tworjeć. Wo tym ma zwjazkowe předsydstwo abo prezidij rozsudzić. Namjet je přiwzaty, hdyž je so znajmjeńša połojca člonow organa na wothłosowanju wobdžěliła a wjetšina hłosakmanych za namjet hłosowała, chibazo wustawki něšto drugeho postajeja.

10. Hdyž so wuměňjenja za płačiwe wobzamknjenja zasadnje změnja, móže so wotpowědne prašenje znova w zwjazkowym předsydstwje wobjednać. Při tym ma so wo tym rozsudzić, hač so dotalne wobzamknjenje zběhnje.
11. Wólby a personalne rozsudy přewjeduja so w tajnym wothłosowanju. Smě so zjawnje wolić, hdyž njeje žadyn člon zwjazkowneho předsydstwa přećiwo tomu.
Wolena je zasadnje wosoba, kotraž dóstanje wjace hač połojcu hłosow wšitkich člonow zwjazkowneho předsydstwa.
Při wjacorych mjenach na jednym wólbnyh lisćiku su ći wuzwoleni, kotřiž su po rjedže najwjac hłosow dóstali. Při runosci hłosow ma so wuša wólba přewjesć.
Woleny je potom tón, kiž docpěje we wušej wólbje wjetšinu hłosow.
12. Tajne, listowe wólby su móžne. Wo tym ma zwjazkowe předsydstwo abo prezidij rozsudzić.
13. Člonojo zwjazkowneho předsydstwa njesmědža so na wobjednanju a schwalenju naležnosćow wobdželić, hdyž móže wobzamknjenje jim wosobinsce, jich swójbnyh resp. přiwuznym přerjeho stopjenka abo institucijam, kiž woni juristisce zastupuja, bjezposredne lěpšiny abo njelěpšiny přinjesć.
Potrjecheny člon zwjazkowneho předsydstwa dyrbi sam swoju zajatosć do wobjednanja wotpowědneje naležnosće přizjewić. Wón smě so w padže zjawneho džěla posedženja k hosćom sydnyc, w padže njezjawneho džěla pak dyrbi posedžensku rumnosć wopušćić.
Hdyž wobsteja dwěle na zajatosći resp. njezajatosći, potom rozsudzi so w njeprítomnosći potrjecheneho.
To samsne płaći za wšitkich dalších prítomnych abo digitalnje prítomnych.

§ 8

Protokol zjawneho džěla posedženja

1. Wo kóždym zjawnym posedženju zdžěla so protokol wobzamknjenjow. Jako pomocny srědk za protokolowanje zjawneho džěla posedženja wužiwa so natočenje.
2. Protokol zjawneho džěla ma wobsahować:
 - termin, městnosć, započatk a kónc wuradžowanja,
 - mjeno nawody/nawodow zeńdženja,
 - prítomnosć člonow a hosći,
 - dnjowy porjad,
 - čisła a titule wobjednaných předłohow,
 - wobzamknjenja z formulaciju namjeta, z wuslědkom wothłosowanja a z běžnym čisłom tuteje wólbneje doby,
 - nadawki, kiž su so druhim gremijam přepodali,
 - wosobinske stejišćo, hdyž sej to člon zwjazkowneho předsydstwa žada a
 - teksty rozprawow k bytosnym naležnosćam jako přidawk k protokolaj.
3. Člonojo zwjazkowneho předsydstwa a jeho stajni hosćo dóstanu w běhu jednoho tydženja po posedženju na digitalnym puću naćisk protokola a smědža k protokolaj.

pokiwky abo korektury zapodać. Doskónčny naćisk přepoda so z podložkami za přichodne posedženje.

4. Županojo a předsydzja sobustawskich towarstwow, kiž njejsu z člonom zwjazkowneho předsydstwa, dóstanu protokol k informaciji, jeli sej to přeja. Samsne plaći za předsydu rewizijneho wuběrka a předsydu změrcowskeho wuběrka.
5. Protokol a spjelnjenje wobzamknjenow kontrolujetej so na přichodnym zjawnym wuradźowanju zwjazkowneho předsydstwa.

§ 9

Protokol njezjawneho džěla

1. Wo kóždym njezjawnym posedženju zdžěla so wuslědkowy protokol. Jako pomocny srědk za protokolowanje njezjawneho džěla posedženja smě so natočenje wužiwać, kotrež ma so po wopodstatnjenju protokola zničić.
2. Wobzamknjenja njezjawneho džěla maja so ze separatnym běžnym čislowanjom protokolować ("n" před čisłom).
3. Wobsteji móžnosć jednotliwe wuprajenja po słowje do protokola přewzać.
4. Sobustawam změrcowskeho wuběrka ma so na žadanje protokol pod dohladom w zarjedže spřistupnić.
5. Protokol njezjawneho džěla kontroluje so na přichodnym posedženju zwjazkowneho předsydstwa.

§ 10

Předłohi

1. Předłohi do zwjazkowneho předsydstwa smědža zapodać:
 - prezidij,
 - předsyda a městopředsydaj Domowiny,
 - člonjo zwjazkowneho předsydstwa,
 - džělowe wuběrki resp. džělowe skupiny,
 - rewizijny a změrcowski wuběrk Domowiny,
 - předsydstwa sobustawskich župow a towarstwow, kaž tež
 - zarjad Domowiny a
 - Rěčny centrum WITAJ.
2. Předłohi zdžělaja so, hdyž so trěbnosć wobjednanja wotpowědneho prašenja ze stron wolenych gremijow třěšneho zwjazka, předsydstwow sobustawskich župow a towarstwow kaž tež zarjada Domowiny zwěsći, hdyž zwjazkowe předsydstwo wotpowědny nadawk wobzamkne abo posedženski plan zwjazkowneho předsydstwa to předwidzi.

3. Předłohi měli so zasadnje prezidijej k předwobjednanju přepodać, zo by móht zwjazkowemu předsydstwu doporučenje k doskónčnemu wobjednanju předłohow přepodać. Referentka za naležnosće třěšneho zwjazka rjaduje, čisťuje a spřistupnja, resp. wozjewja předłohi we wothłosowanju z prezidijom.
4. Za přihotowanje předłohow ma so wosebity formular wužiwać (hlej přiłoha).
Kóždy předłoha ma swoje čisło (běžne čisło + lětoličba).
Předłohi, kiž so w prezidiju na zakładže § 6, dypk 5, smužka 10 abo § 12, dypki 2, 4 abo 5 tutoho jednanskeho porjada dorozsudža, maja před běžnym čislom přidawk "P".
Předłohi, kotrež so w zwjazkowym předsydstwje doskónčnje wobjednaja a schwala, maja přidawk "ZP".
Wobě družinje předłohow so separatnje ličitej a skladujetej.
Wopodstatnjenje za namjet k wobzamknjenju přida so we wotpowědnej přiłoze.
5. W předłohach, kiž služa jenož k informaciji, zapisuje so do rubriki "Namjet za wobzamknjenje" pasus, zo so informacija na wědomje bjerje.
6. Financne wuskutki wobzamknjenjow maja so mjenować a zarjad Domowiny měł financujomnosć do wobjednanja w prezidiju pruwować a z podpismom hłowneje jednaćelki, jednaćela abo referenta za hospodarske a infrastrukturelne naležnosće wopodstatnić.
7. Hdyž so w běhu jednanjow zwjazkowneho předsydstwa wotchilacy namjet k wobzamknjenju formuluje, potom pisa so nowa formulacija do přehlada předłohow.

§ 11

Wutworjenje džělowych wuběrkow

1. Zwjazkowe předsydstwo abo prezidij wutworitej po potrebjce k analytiskemu a koncepcionelnemu wobdžělanju naležnosćow džělowe wuběrki. Kóždy wuběrk měł ze znajmjeńša 5 wosobow wobstać, wjetšina z nich měła być z člonom zwjazkowneho předsydstwa. Postajeja so zestawa a nawoda džěloweho wuběrka, jeho naměstnik, po wobsahu přislušny zamołwity zarjada, wobsahowe zaměry džělawosće a doba skutkowanja.
2. Wuběrki maja prawo, stajić próstwu wo juristisku poradu na prezidij.
3. Za wotběh posedženjow džělowych wuběrkow plaća w zasadze postajenja jednanskeho porjada zwjazkowneho předsydstwa wotpowědnje. Wuradžowanja wuběrkow su zasadnje njezjawne. Wuwzaća su móžne.
Člonam zwjazkowneho předsydstwa a prezidija je přistup w kóždym času móžny.
4. Protokole wuradžowanjow džělowych wuběrkow dóstawaja nimo wuběrkownikow tež člonajo prezidija. Člonajo zwjazkowneho předsydstwa smědža sej protokole požadać.

5. Jako člonoyo džěłowych wuběrkow móža so nimo člonow zwjazkowego předsydstwa a prezidija dalši zastupjerjo župow a towarstwow kaž tež fachowcy powołać. Woni podleža samsnemu rjadowanju dowěrliwosće kaž člonoyo zwjazkowego předsydstwa.
6. Wuběrki rozprawjeja zwjazkowemu předsydstwu abo prezidijej prawidłownje wo rezultatach a džěławosći swojeho skutkowanja a předpołoža wotpowědne namjety jako předłohi k wobjednanju a schwalenju.
7. Předsydža wuběrkow smědža na zakładže naprašowanjow medijow abo po swójskim rozsudže wuběrkownikow zjawnosć k tematiskim čěžiščam njezjawnych posedženjow wuběrkow informować. Při tym ma so wobkedźbować, zo ma so jednać wo powšitkowne informacije džěławosće wuběrkow, nic pak wo naćiskach, kiž ma zwjazkowe předsydstwo dodiskutować a wobzamknyć.

§ 12

Prezidij

1. Po artiklu 10, dypk 1 wustawkow Domowiny slušeja do prezidija předsyda Domowiny, jeho městopředsydaj a dalšej člonaj zwjazkowego předsydstwa, kotrejuž na namjet předsydy zwjazkowe předsydstwo powoła.
2. Po artiklu 10 dypkaj 3 a 4 wustawkow Domowiny postaja zwjazkowe předsydstwo slědowace zamołwitosće prezidija:
 - a. přihotować wobsahowje posedženja zwjazkowego předsydstwa,
 - b. poradźować zwjazkowe předsydstwo we wobsahowych a wažnych organizatoriskich prašenjach a k tomu předpołožiť trěbne předłohi,
 - c. poradźować předsydu Domowiny w jeho běžnej džěławosći,
 - d. wutworić w nadawku zwjazkowego předsydstwa nachwilne džěłowe skupiny resp. wuběrki a jich džěło koordinować,
 - e. poradźować předsydu a jednaćelstwo při koordinaciji běžneje džěławosće zarjada Domowiny a Rěčneho centruma WITAJ a přijimać k tomu trěbne informacije,
 - f. přihotować hłowne zhromadźizny Domowiny a nawjedować wudžěłanje rozprawy wo zwoprawdženju nadawkow džěłowych směrnicy zwjazkowego předsydstwa a
 - g. rozsudzić wo slědowacych prašenjach:
 - chwattnje trěbne stejišća Domowiny k naćiskam prawnskich předpisow a k aktualnym prašenjam,
 - stejišća Domowiny k předewzaćam regionalneho planowanja,
 - delegowanje kulturnych skupin w nadawku Domowiny, projekty kulturneje wuměny a službne jězby čestnohamtskich zastupjerjow Domowiny do wukraja,
 - koncepty za rěčnicy a jubileje,
 - naprawy w zwisku z wobhospodarjenjom imobilijow Domowiny,
 - nadawki k prawniskej poradze Domowiny,

- kónčna redakcija za stejišća, rezolucije, brošurki, memorandumy a podobne wozjewjenja Domowiny, kiž so w zjawnosći rozšěrjeja.
 - wobdželenje Domowiny na projektach druhich nošerjow,
 - koncepty za wopomnjenske dny,
 - z běžneje džělawosće třěšneho zwjazka wotwodžene nadawki za džělowe wuběrki zwjazkowego předsydstwa.
3. Zwjazkowe předsydstwo informuje so na kóždym posedženju wo džělawosći prezidija a dóstawa pisomny přehlad rozsudow posedženjow prezidija z podložkami za swoje přichodne posedženje.
 4. Posedženja prezidija su zasadnje njezjawne. Čłonojo zwjazkowego předsydstwa smědža so na posedženjach wobdželeć. Čłonojo zwjazkowego předsydstwa maja prawo, prezidijej namjety za wobjednanje naležnosćow zapodać.
 5. Džělawosć prezidija rjaduje wosebity jednanski porjad, kiž zwjazkowe předsydstwo schwali.

§ 13

Winowatosće čłonow zwjazkowego předsydstwa

1. Nimo aktiwneho wobdželenja na posedženjach zwjazkowego předsydstwa ma čłon zwjazkowego předsydstwa wosebite winowatosće napřećo župje resp. towarstwu, kotraž/kotrež je jeho za wólby do zwjazkowego předsydstwa nominowała/o. Wón ma předsydstwo župy resp. towarstwa prawidłownje wo jeho skutkowanju informować, předłohi w předpolu posedženjow z nimi diskutować, wobzamknjenja zwjazkowego předsydstwa rozkłasć a jich přesadženje podpěrować.
2. Wobzamknjenja su za kóždoho čłona zwjazkowego předsydstwa jenak zwjazowace. Žadyn čłon zwjazkowego předsydstwa nima po wotumje wjetšiny gremija prawo, přesadženje wobzamknjenjow blokować a napřećiwne aktiwity přewjesć.
3. Hdyž zwjazkowe předsydstwo postaji, zo njesmě so wo wěstych prašenjach zjawnje informować, ma kóždy čłon gremija winowatosć k mjelčenju. Tuta winowatosć wobsteji hač do wuwjazanja na zakładze rozsuda zwjazkowego předsydstwa. Winowatosć k mjelčenju płáči bjez wobmjezowanja za personalne daty.
4. Kóždy čłon zwjazkowego předsydstwa je k aktiwnemu zjawnostnemu džělu namołwjeny.

§ 14

Zjawnostne džěło

1. Zjawnosć a žurnalisća přeprašuja so z nowinskim wozjewjenjom a z nawěškom na zjawne wuradžowanja zwjazkowego předsydstwa.

2. Dnjowy porjad zjawneho džěla so najpozdžišo 3 džělowe dny do posedženja w serbskej a němskej rěči w interneće wozjewi.
3. Podložki zjawneho džěla posedženja wozjewja so w zapodatej rěči tohorunja najpozdžišo 3 džělowe dny do posedženja na internetnej stronje Domowiny. Z toho wuwzatej stej rozprawa předsydy a rozprawa prezidija Domowiny. Wo dalšich wuwzacach smětej zwjazkowe předsydstwo a prezidij rozsudzić.
4. Wobzamknjenja zjawneho džěla posedženjow zwjazkowego předsydstwa maja so w běhu jednoho tydženja na internetnych stronach Domowiny wozjewić.
5. Po posedženju zhotowi medijowy rěčnik medijowe wozjewjenje wo hłownych ćežiščach a wuslědkach zeńdženja.
Po wothłosowanju z jednym čonom prezidija posrědkuje so tute redakcijam, čonom zwjazkowego předsydstwa a dalšim zajimowanym adresatam.
Zdobom ma so wone na internetnej stronje Domowiny wozjewić.
6. Rozsudy interneho resp. dowěrliweho razu, kotrež njesmědža so wozjewić, so na posedženju konkretnje pomjenuja.

Dalokož so w tutym jednanskim porjedže funkcije a pomjenowanja po muskim abo žónskim splahu wopisuja, měni so z tym runohódnje žónski a muski splah.

Jednanski porjad zwjazkowego předsydstwa za wólbnu dobu 2021-2025 schwali so na posedženju zwjazkowego předsydstwa dnja 12.04.2024 a nabudže z tym plaćiwosć.

Příloha 1 – předloha**DOMOWINA****Předloha č. ZP .../...****za ... (rjadne) posedženje Zwjazkowneho předsydstwa Domowiny dnja ... w ...****Zapodačel/-ka předlohi:****Awtor/-ka předlohi:****Nastupa (předmjet wuradźowanja):**Slěd wobjednanja předmjeta předlohi:

gremij resp. organ Domowiny	datum	wuslědk wuradźowanja resp. doporučenje

Namjet za wobzamknjenje:**Zwjazkowe předsydstwo Domowiny wobzamkne:****Tekst wobzamknjenja.**

datum:

.....
podpismo zapodačelaFinancne wuskutki wobzamknjenja: zjimanje/wopisowanje financnych wusutkowFinancujomnosť je so pruwowała: (datum a podpismo jednačelstwa, resp. referenta)Wuslědk wothłosowanja:

za namjet:

přećiwo namjetej:

hłosawzdaće/a:



DOMOWINA

**Předłoga cysło ZP .../.....
za ... (pórědne) pósejženje Zwězkowego předsedarstwa Domowiny
dnja w**

Zapódař předłogi:

Awtor předłogi:

Nastupnosć (předmjat wobradowanja):

Slěd wobjadnanja předmjata předłogi:

gremij resp. organ Domowiny	datum	wuslědk wobradowanja resp. dopóručenje

Naraženje za wobzamknjenje:

Zwězkowe předsedarstwo Domowiny wobzamknjo:

datum:

.....
pódpismo zapódarja

Financne wustatkowanja wobzamknjenja:

Financujobnosć jo se pšepytowała: (datum a pódpismo referenta resp. jadnarja)

Wuslědk wótgłosowanja:

za naraženje:

pšešiwu naraženju:

głosa zdžaržanje/-i/-a::

Příloha 2 – časowe doby gremijow



DOMOWINA

Rjadowanja w jednanskimaj porjadomaj Zwjazkowego předsydstwa Domowiny a jeho prezidija nastupajo časowe doby

Čas	Naprawa	Žórto
7 dnjow do posedženja P	Podložki maja so do póšty dać.	
5 dnjow do posedženja P	Maja podložki člonam P předležeć.	§ 5 (10) JP-P
9 dnjow do posedženja ZP	Podložki maja so do póšty dać.	
7 dnjow do posedženja ZP	Podložki maja člonam ZP předležeć.	§ 3 (10) JP-ZP
	Podložki so člonam ZP přez cloud k dispoziciji staja.	§ 3 (10) JP-ZP
tydžeń do posedženja ZP	Informacije medijam wo zjawnym džělu posedženja.	§ 3 (1) JP-ZP
hač do 3 džělowych dnjow do posedženja ZP	Móžnosć za člonow ZP, temy za "aktualnu debatu" zapodać.	§ 3 (5) JP-ZP
hač do 3 dnjow do posedženja ZP	Dnjowy porjad posedženja ZP so serbsce a němsce w interneće wozjewi.	§ 14 (2) JP-ZP
	Podložki zjawneho džěla posedženja wozjewja so na internetnej stronje Domowiny. Z toho wuwzatej stej rozprawa předsydy a rozprawa prezidija Domowiny.	§ 14 (3) JP-ZP
hač do 3 hodžin do posedženja	ZP ma so link k posedženju sposrědkować.	§ 3 (16) JP-ZP
do posedženja	Člonojo ZP maja zarjad Domowiny abo předsydu wo zadžěwanju informować.	§ 5 (1) JP-ZP
	Člonojo ZP maja digitalne wobdžělenje přizjewić.	§ 5 (3) JP-ZP
Posedženje zwjazkowego předsydstwa		
do schwalenja dnjoweho porjada	Člon ZP smě próstwu wo wuzamknjenje zjawnosće při wobjednanju wěsteho dypka dnjoweho porjada stajić.	§ 3 (6) JP-ZP
po posedženju	Medijowy rěčnik zhotowi medijowe wozjewjenje wo hłownych čěžiščach a wuslědkach zeńdženja. (posrědkowanje z maillku a na internetnej stronje)	§ 14 (5) JP-ZP
tydžeń po posedženju	Protokol so člonam ZP a hosćom zjawneho džěla digitalnje sposrědkuje.	§ 8 (3) JP-ZP
	Wobzamknjenja zjawneho džěla posedženja maja so na internetnych stronach wozjewić.	§ 14 (4) JP-ZP
lěto po posedženju	Znajmjeńša lěto ma livestream přistupny być.	§ 3 (1) JP-ZP